

SUNESIOS VAN KURENE, *HIMNE 6*: VERTALING EN KOMMENTAAR

J H Barkhuizen (Universiteit van Pretoria)

Summary

Following a translation of *hymn 6* in Afrikaans, and a few remarks on its structure and nature, an analysis of this christological hymn is provided in the form of a commentary on each of the 7 strophes. Several “perspectives” occur throughout the hymn, namely that of *praise* (strophes 1 and 3), *prayer* (2/7), *historical reference* (4), *liturgical context* (5), while the hymn concludes with a cosmic perspective (6). Although the hymn lacks a clear philosophical and theological reflection, and is characterised by a soberness absent from *hymns 7-8*, which constitute with *hymn 6* his christological trilogy, Synesius nevertheless shows forth the distinct nature of his poetry as hymn of praise. In the “historical” section of his hymn he uses the amazement of the Magi to contrast human wisdom with divine omniscience, while interpreting the gifts of the Magi allegorically in order to arouse his audience to participate in the praise of Christ, the Son of God and the virgin.

Teks¹ en vertaling

Πρῶτος νόμον εὐρόμαν ἐπὶ σοί, μάκαρ, ἄμβροτε, γόνε κύδιμε παρθένου, Ἰησοῦ Σολυμῆε, νεοπαγέσιν ἀρμογαῖς κρέξαι κιθάρας μίτους.	5
Ἄλλ' εὐμενέοις, ἄναξ, καὶ δέχνησο μουσικὰν ἐξ εὐαγέων μελῶν.	
Ἕμνήσομεν ἄφθιτον θεόν, υἷα θεοῦ μέγαν, αἰωνοτόκου πατρὸς τὸν κοσμογόνον κόρον, τὰν παντομιγῆ φύσιν, σοφίαν ἀπερείσιον, τὸν ἐπουρανόιοις θεόν τὸν ὑποχθονίοις νέκυν.	10 15
Ἐχύθης ὄτ' ἐπὶ χθονὶ βροτέας ἀπὸ νηδύος, μάγος ἅ πολύφρων τέχνα	20

¹ Lacombrade 1978:86-87.

ἔξ ἀστέρος ἀντολᾶς
 θάμβησεν ἀμήχανος·
 τί τὸ τικτόμενον βρέφος;
 Τίς ὁ κρυπτόμενος θεός,
 θεὸς ἢ νέκυς ἢ βασιλεύς; 25

Ἄγε, δῶρα κομίζετε,
 σμύρνης ἐναγίσματα,
 χρυσοῦ τ' ἀναθήματα,
 λιβάνου τε θύη καλά. 30
 Θεὸς εἶ, λίβανον δέχου·
 χρυσὸν βασιλεῖ φέρω·
 σμύρνη τάφος ἄρμόσει.

Καὶ γὰρ ἑκαθήραο,
 καὶ πόντια κύματα,
 καὶ δαιμονίας ὁδοὺς, 35
 ῥαδινὰν χύσιν ἀέρος,
 καὶ νερτερίους μυχοὺς,
 φθιμένοισι βοηθός,
 θεὸς εἰς Ἄϊδαν σταλεῖς.

Ἄλλ' εὐμενέοις, ἄναξ, 40
 καὶ δέχνυσο μουσικὰν
 ἔξ εὐαγέων μελῶν.

Ek was die eerste wat 'n melodie² ontwerp het
 om tot u eer, o Geluksalige, Onsterflike,
 roemryke Seun van 'n maagd,
 Jesus van Jerusalem,³
 met nuwe toonaarde⁴ 5
 die snare van my kithara te pluk.

Wees my dan⁵ goedgesind, o Vors,
 en ontvang die harmonie
 van my heilige liedere.

Ons sal die onsterflike 10
 God besing, die magtige Seun van God,
 die Skepper van die kosmos, Seun
 van die Vader wat die eeue voortbring;

2 Of: "komposisie".

3 Sunesios gebruik die terme Σόλυμοι en Σολυμήιος vir Jerusalem.

4 Of: "akkoorde".

5 Ἄλλ' (in die Grieks) dui hier op die gedagte van: al het ek eerste 'n nuutontwerpte νόμος daargestel om U te besing, is dit nogtans u guns wat my lied Godpassend maak.

- (en) sy alomteenwoordige⁶ natuur,
 (en) sy onbeperkte wysheid; 15
 Hy wat God is vir die hemelinge,
 (maar) dooie (lyk) vir dié onder die aarde.
- Toe U “uitgegiet” is op aarde
 vanuit ’n sterflike moederskoot,
 was die Magiërs in hulle kundige wetenskap⁷ 20
 verwonderd en stomgeslaan
 voor die opkoms van ’n ster.
 Wie was dié kind wat sopas gebore is?
 Wie hierdie verborge God?
 ’n God of ’n sterfling⁸ of ’n koning? 25
 Kom, bring julle geskenke,
 dodeoffers van mirre,
 sowel as gawes van goud,
 en pragtige offers van wierook.
 U is God, ontvang die wierook. 30
 Ek bring goud vir die Koning.
 Die mirre sal gepas wees vir u begrafnis.⁹
- En U het die aarde gereinig,
 en die golwe van die see,
 en die weë van demone 35
 - die dun lugstrome -
 en die onderaardse holtes.
 U was ’n hulp vir die gestorwenes,
 toe U as God na Hades gestuur is.
- Wees my dan goedgesind, o Vors, 40
 en ontvang die harmonie
 van my heilige lieder.

Uiteensetting

Naas Gregorios van Nazianzos, is Sunesios (370-414) een van die belangrikste Christelike digters wat himnes in klassieke metra gedig het. Gebore uit ’n invloedryke familie in Kurene, het hy in Aleksandrië filosofie onder die bekende heidense vrouefilosof, Hupatia, bestudeer, veral die Neo-Platonisme. In Aleksandrië is hy ook in 403 getroud met ’n Christelike vrou, en is hy tot die Christendom bekeer. In 410 is hy deur die inwoners van Ptolemais uitgenooi om hulle biskop te word, en is hy teen sy sin as biskop in die jaar 411 gewy. Sunesios is waarskynlik in 413 oorlede, en is

6 Letterlik: “wat met alles meng”.

7 In die Grieks is τέχνη die onderwerp. Dit is egter beter om in Afrikaans die Magiërs self die onderwerp van die sin te maak.

8 Letterlik: “lyk”.

9 Of: “graf”.

derhalwe die dood van Hupatia in 415, deur die toedoen van 'n aantal fanatieke monnike, gespaar gebly. Hy is veral bekend vir sy nege himnes, wat nie oor die Christelike dogma as sodanig handel nie, en ook nie bedoel was as sang-liedere in die erediens nie (alhoewel dit nietemin wil voorkom of *himnes* 6-8 deel kon uitmaak van 'n liturgiese opset). Die rede hiervoor was natuurlik die feit dat hulle in die Doriese dialek en in klassieke metra (meesal anapestiese mono-, di- en trimeters) gedig is. Die Doriese dialek was uiteraard, maar ook die klassieke metra, vreemd op die oor en tong van die gewone Griekssprekende burger van die Hellenistiese wêreld, toe Grieks reeds oorgegaan het tot 'n ritmiese heffing, gebaseer op die aksent, baie soos in moderne tale (kyk Mitsakis 1971).

Die nege himnes van Sunesios vertoon 'n eienaardige mengsel van Neo-Platoniese en Christelike idees. Baldwin (1985:44) beskrywe dan ook die algemene aard van die nege himnes as "a farrago of Neoplatonist and other images and ideas". Maar dit is veral *himnes* 6-8 wat 'n noue eenheid vorm, 'n groter kennis van en vertrouwdheid met die Christelike geloof vertoon (Quasten 3.113), en deur Lacombrade (1978:85 en 92) as Christologiese himnes omskrywe is—wat hy noem 'n "trilogie chrétienne". Die *sesde himne* handel oor die adorasië van die Wyse Manne en bied aan sy lesers of gehoor 'n interpretasie van die Magiërs se geskenke. Sunesios merk in hierdie himne met trots op dat hy die eerste was om 'n liriese lied oor Christus te komponeer met begeleiding van die kithara.

Die doel van hierdie artikel is om dan kortliks die gedagtegang van *himne* 6 skematies aan te dui en enkele opmerkinge te maak oor die eieaard van die himne.

Opbou en aard van die himne

Himne 6 bestaan uit 7 strofes, waarvan 'n refrein-strofe (kyk nota 10) die derde en slotstrofe vorm. Elke strofe bied 'n eie "perspektief": (i) strofe 1 verwys na die digter se lied as lofkuns; (ii) strofe 2 en 7 bevat die gebedselement; (iii) strofe 3 herhaal die lofelement wat reeds in strofe 1 aangeraak word; (iv) strofe 4 het 'n historiese perspektief; (v) strofe 5 is liturgies van aard; en (vi) strofe 6 bevat die himne se "kosmiese" perspektief.

Die *gedagtegang* van die gedig, soos wat dit in elke strofe ontvou word, kan soos volg saamgevat word:

1. 1-6: Die digter wil deur hierdie nuwe metriese lied Jesus, die Seun van 'n maagd, besing.
2. 7-9: Gebedsrefrein vir die goedgeunstige ontvangs van die lied.¹⁰
3. 10-17: Die digter besing Jesus wat sowel Seun van die almagtige God is as God wat mens geword het.
4. 18-24: Die ster wat sy geboorte aangekondig het, het die Wyse Manne in hulle wysheid en wetenskap verwonderd laat staan.

10 Lacombrade (1978:85) verwys wel na die "skynbare" refreinkarakter ("apparentment un refrain"), maar deel nogtans 7-9 (=40-42) in by deel 1 en 6 respektiewelik. Soos in die geval van *himne* 8, die derde himne in hierdie trilogie, wat eweneens deur 'n refrein gekenmerk word, is dit beter om dié versreëls as aparte refrein in te deel. Die gebed word in 'n mate ook gereflekteer in reël 30: θεός εἶ, λιβανον δέχου.

5. 26-32: Die mistieke simboliek van die offers van die Wyse Manne.
6. 33-39: Christus het die heelal gereinig van die demone en die gestorwenes in Hades te hulp gesnel.
7. 40-42: Gebedsrefrein = 7-9.

Hierdie is 'n epifanie-himne (Lacombrade 1978:84), wat gekenmerk word deur 'n sterk mate van *soberheid* teenoor die soms sterk liriese karakter wat kenmerkend is van sommige van sy ander himnes, sodat Wilamowitz (1907:288) selfs praat van 'n "koudheid" wat in hierdie himne te vinde is. Opvallend is ook die afwesigheid in dié gedig van 'n beduidende filosofiese (metafisiese) en teologiese nadenke.

Kommentaar

Die *openingsgedeelte* (1-6) is net soos in die geval van *himne* 7.1-5 en 8.1-3 'n *lofuiting* op Jesus, die seun van 'n maagd. As sodanig volg dit die algemene openingspatroon van die Ou Testamentiese en Lukaanse lofliedere, maar wat ook dikwels in die profane Grieks-religieuse digkuns voorgekom het. Die woorde ἐπὶ σοί, μάκαρ, ἄμβροτε, γόνε κύδιμε παρθένου van reëls 2-3, kom net so voor in *himne* 7.4-5, terwyl dit in *himne* 8 in reëls 1-2 in 'n soortgelyke vorm voorkom: κύδιμε, σέ, μάκαρ, γόνε παρθένου. In die refrein van *himne* 8 word κύδιμε herhaal, terwyl γόνε παρθένου afgewissel word deur πᾶν παρθένου. Dit op sigself bevestig reeds die noue verband tussen dié drie himnes, soos hierbo aangedui.

Sunesios beskou sy lied as een gekomponeer in 'n harmonie wat hy as sy eie uitvindsel opeis. Inderdaad het ons hier ook te make met 'n tipe van oorspronklike *telesilleion*, wat ook in *himnes* 7 en 8 voorkom, dáár beide as katalekties en a-katalekties, maar hier net as a-katalekties, waardeur die eerste lange deur twee kortes, en die laaste lange deur een korte vervang kan word: $\bar{\text{—}}\text{—}\text{—}\text{—}$ (kyk verder Keydel 1956:151-152).

Die gebed van Sunesios in die twee refrein-strofes (2/7) om die goedgunstige ontvangs van sy lied, hou verband met 'n *topos* uit sowel die Grieks-profane digkuns as uit patristiese tekste. Hierdie *topos* bestaan in 'n "belydenis" (hier afwesig) van die digter se onvermoë om die godheid/God na behore te kan loof, en wat daarom bid (hier teenwoordig) om 'n goeie ontvangs van sy lied (kyk ook Epiktetos *Diss.* 1.16,19-21; Proklos van Konstantinopel, *homilie* 3.3 [PG 65.705D] en 22.1 [ed. Aubineau]; Romanos Melodos, *himne* 29.24.7-11 [ed. Grosdidier de Matons]; en ps.-Afrem, *Abraham Kidunaya* 5, strofes 30-32). By Sunesios hou die gebed om guns direk verband met die feit dat hy 'n melodie/komposisie met nuutontwerpte toonaarde daargestel het, en dat God dit juis goedgunstig sal ontvang.

Die derde deel van die *himne* (10-17) neem die *lofmotief* weer eens op: die digter (en die gemeente—kyk hieronder) besing die Seun se onsterflike en skeppende mag (ἄφθιτον, 10; μέγαν, 11; κοσμογόνον, 13), sy alomteenwoordigheid (παντομυγῆ φύσιν, 14) en sy alwysheid (σοφίαν ἀπερείσιον, 15), en verhef terselfdertyd ook die Vader se skeppingsmag (αἰωνοτόκου πατρὸς, 12). Sunesios probeer om hierdie goddelike eienskappe te benadruk deur onder andere die gebruik van klankspel met veral α- (10, 12, 15), κ-/γ- (11, 12, 13, 14), en υ- (10, 11).

Hierdie goddelike eienskappe, veral die alwysheid van God, word in die vierde, die *historiese gedeelte* (18-24), gekontrasteer met die wysheid van die Magiërs, waardeur die digter die sogenaamde *verbasingsmotief* as tegniek gebruik. In hierdie historiese deel beskryf Sunesios die geboorte van Jesus, met verwysing na die verdwaasheid en verwondering aan die kant van die Magiërs oor die verskyning van die ster. Ten spyte van hulle wyse wetenskap (πολύφρων τέχνα, 20), staan hulle stomgeslaan en verwonderd voor die epifanie-gebeure: θάμβησεν ἀμήχανος, waardeur πολύφρων skerp afsteek teen ἀμήχανος, terwyl die plasing van hierdie twee woorde alleen en saam in een reël, ook stilisties die kontras tussen God se wysheid en hulle kundigheid onderstreep. Wat die *verbasingsmotief* betref, Sunesios gebruik hierdie selfde motief ook in *himne* 8 waar die magte van die hemelruim vol verbasing staan voor die hemelvaart van Christus: θάμβησε δ'...χορὸς...ἀστέρων (8.34-35—kyk Barkhuizen 1993:268; en Homeros *Il.* 8.76-77: οἱ δὲ ἰδόντες θάμβησαν). Die Magiërs se magtelose verbasing hou direk verband met die twee nature van Christus, 'n aspek wat in die sentrum van belangstelling in die Vroeë Kerk gestaan het: die Kind wat gebore is, is terselfdertyd God. Dit herinner aan Romanos Melodos, *himne* 10.10.1 en volgende, waarin vertel word dat die Magiërs verskrik staan by die aanskoue van die Kind Jesus omdat hulle besef dat Hy ἀγενεαλόγητος is, terwyl die refrein van genoemde *himne* 10 Christus besing as παῖδιον νέον, wat terselfdertyd ook ὁ πρὸ αἰώνων θεός is:

Die Magiërs het onmiddellik die kamer ingehaas;
by die aanskoue van Christus was hulle verskrik toe hulle
sy moeder en haar verloofde daar sien.
En in hulle vrees het hulle gesê: “Hierdie kind is sonder 'n menslike vader.
Hoe kom dit, o maagd, dat ons hierdie man sien
wat nou hier in jou huis staan?
Jou swangerskap was tog onbevlek?
Moenie dat Josef se teenwoordigheid skande oor jou werp nie.
Daar is talle nydige mense wat navraag doen oor waar gebore is
nou 'n Kindjie, maar God voor alle eeue!”

Vir Sunesios is Hy egter ook die “verborge” God. Hy het sy godheid verberg in sy mensheid, wat ook tewens verklaar waarom Hy, volgens die patristiese tradisie, die Dood kon mislei: in die voorkoms van 'n “lyk” (νέκυς), het Hy as God afgedaal (reël 39: θεὸς εἰς Ἄϊδαν σταλείς—vgl. ook Proklos van Konstantinopel, *homilie* 11.1: σήμερον ὁ θάνατος ἐδέξατο τὸν αἰεὶ ζῶντα νεκρόν), sy godheid dus agter sy menslikheid verberg, en so die Dood oorwin (kyk hiervoor veral Grosdidier de Matons 1981:233-261 in Romanos Melodos). Die parallelle rym- en woordstruktuur van die twee reëls dien as stilistiese klem:

τί τὸ τικτόμενον βρέφος;
τίς ὁ κρυπτόμενος θεός;

'n Verdere ooreenkoms tussen die derde en vierde deel is die soberheid en hardheid waarna aan die begin verwys is as besondere kenmerk van hierdie *himne*. In die derde

deel is dit veral reëls 16-17 wat as twee parallel-gestruktureerde sinne sonder verbindingspartikel die aandag trek, en 'n skerp, "harde" kontras stel tussen die twee "nature" van Christus:

τὸν ἐπουρανόσις θεόν,
τὸν ὑποχθονίσις νέκυν.

Hy wat vir die hemelinge God is, is 'n blote lyk vir die onderaardse (kyk Proklos van Konstantinopel, *homilie* 11.1: συνεπλάκη μὲν γὰρ τῷ θανάτῳ ὡς νεκρός. Die Bybelse bron is waarskynlik 2 Kor 13:4: "want al is Hy gekruisig in die swakheid van die mens, Hy leef uit die krag van God"). Laasgenoemde aspek, dat Hy as blote lyk in die onderwêreld aangesien is, het natuurlik aanleiding gegee tot een van 'n paar voorstellinge oor wat werklik in die onderwêreld gebeur het. Een opvatting was dat Hades Christus as blote menslike lyk aangesien het, Hom verblind het, en so die goddelike aas ingesluk het. Hy word dan verplig om Christus en die gestorwe mensdom uit te braak. Alhoewel Sunesios nie hierop ingaan nie, suggereer sy woordgebruik en kontras in hierdie twee reëls wel sy kennis met dié opvatting.

In hierdie vierde deel word die soberheid, waarvan melding gemaak is, verder versterk deur die uitdrukking ἐχύθη...ἐπὶ χθονὶ (18), waardeur Sunesios Christus se geboorte aandui. Hierdie uitdrukking verwys na 'n werklike geboorteproses in die antieke tye, soos dit in Eks 1:16 beskrywe word.¹¹ Dié gedagte is onder andere ook deur Proklos van Konstantinopel opgeneem in een van sy homilieë, waarin dit juis gaan oor die *menslike nietigheid*: ἔπεσεν εἰς τὴν γῆν τὸ βρέφος (*hom.* 36.3.1—kyk Barkhuizen 1996). Die "soberheid" van hierdie uitdrukking staan in skerp kontras met *himne* 8.13-14, waarin Sunesios ook na Christus se menswording of inkarnasie verwys, maar dan in die gewone patristies-teologiese terminologie: κατέβας μέχρι καὶ χθονὸς / ἐπίδημος ἐφαμέροις (die woorde βροτέας ἀπὸ νηδύος van reël 19 word in *himne* 8.15 gereflekteer in βρότεόν τε φέρων δέμας). Hierdie duidelik waarneembare trekke van "nugterheid" kan wees omdat Sunesios in hierdie *himne* bloot die ewe nugtere saaklikheid van die berig in Matt 2:11 wou nadoen. In elk geval is dit opvallend dat Sunesios die woord νέκυν herhaal in die vierde deel waar hy berig oor die verwondering van die Magiërs oor wie hierdie "kind is wat gebore is", wie hierdie "verborge God" is. Die vraag word gestel: is Hy dalk God of νέκυν of koning? En alhoewel νέκυν in hierdie konteks waarskynlik met "sterfling" vertaal moet word, doen die herhaling van dié woord kort na reël 17, waar dit nie anders as met "lyk" vertaal kan word nie, opvallend voor, en versterk dit weer eens die sobere karakter van die *himne*.

In die vyfde deel is die imperatief κομίζετε in reël 26, gerig tot die gelowiges, opvallend, omdat dit die enigste imperatief meervoud is wat in die *himnes* van Sunesios voorkom. Dit laat tog die vermoede ontstaan dat hierdie trilogie, anders as in die geval van sy ander *himnes*, wel binne 'n *liturgiese konteks* geplaas moet word, soos blyk uit die titel in *Athous Vatopedinus* 685 (V), 'n manuskrip uit die 13de eeu:

11 Vergelyk Barkhuizen 1996:19, nota 10: "Ex.1.16 refers to the birth-stool, which in fact were two stones (*ha'obnajim*)...The ancient custom was for women to kneel or sit on these stones at the time of their delivery...so that the child, when delivered, falls on the ground".

Συνεσίου ἐπισκόπου ὕμνοι ἔμμετροι εἰς τὴν ἁγίαν τριάδα καὶ εἰς διαφόρους ἑορτὰς δεσποτικὰς (“Metriese himnes van biskop Sunesios op die Heilige Triniteit en die verskillende feeste van die Here”). Die tweede sinsnede verwys duidelik na liedere wat tydens die kerklike feesgeleenthede rondom Christus se lewe gebruik is.

Die *allegoriese* interpretasie van die geskenke van die Wyse Manne is in lyn met ander patristiese tekste. Afgesien van figure soos byvoorbeeld Irenaios (*Adv. haer.* 3.9.2; *PG* 7.870B-871A), verskaf die epifanie-himne van veral Prudentius (*Cath.* 12.65-72) ’n opvallende analogie:

*agnosce clara insignia
virtutis ac regni tui,
puer o, cui trinam Pater
praedestinavit indolem:
regem deumque adnuntiant
thesaurus et fragrans odor
turis Sabaei, at myrreus
pulvis sepulchrum praedocet.*

Herken, o Kind, die duidelike kentekens
van U mag en soewereiniteit,
U vir wie die Vader ’n drievoudige
natuur vooraf bestem het:
die skat(te) en welriekende geur
van die wierook van Saba (’n landstreek in Arabië)
kondig (U) aan as Koning en God,
maar die mirre-stof wys heen op die graf.

In die sesde deel vind ons ’n motief wat hier kortliks aangeraak word, maar in veel meer uitgebreide vorm in *himne 8* voorkom, naamlik Christus se *kosmiese* reinigings- (= verlossings-) mag: hier die reiniging van die lug van demone, wat die domein *par excellence* van die demone is (kyk *himne 1.89* en 8.31-33, asook Ef 6:12: “Ons stryd is...teen elke bose gees in die lug”), asook die verlossing van die gestorwenes, d.w.s. die oorwinning oor Hades (kyk *himne 8.16-27*; 31-37; en Barkhuizen 1993:266-271). Sunesios sluit die himne dus op ’n sterk toon af: in kontras met reël 17 (τὸν ὑποχθονίους νέκυς) is die slotakkoorde sterk en kragtig: φθιμένοισι βοηθός, θεός εἰς Ἄϊδαν σταλείς!

Slot

Ten spyte van die afwesigheid van ’n duidelik filosofiese en teologiese besinning, en die nugterheid van styl en toonaard, wat beslis verskil van die ander twee in die trilogie van Christus-liedere (*himnes 7* en *8*), wys Sunesios in hierdie himne nietemin op die eie aard van sy digkuns as lofkuns op Christus, die Seun van God en van ’n maagd. Terselfdertyd gebruik hy in die historiese deel van sy gedig die verbasing van die Magiërs om menslike wysheid te kontrasteer met Goddelike almag en wysheid, terwyl hy ook die geskenke van die Magiërs so allegories interpreteer dat hy daarmee

ook sy mede-gelowiges aanspoor om deel te neem aan die "lof" op Christus. Die reinigings- en verlossingsaspek wat in die laaste deel (voor die slotrefrein) aangeraak word, vorm terselfdertyd 'n kragtige verkorte weergawe van die meer uitgebreide verwoording daarvan in *himne* 8.16-27.

BIBLIOGRAFIE

- Baldwin, B 1985. *An anthology of Byzantine poetry*. Amsterdam: Gieben.
- Barkhuizen, J H 1993. Synesius of Cyrene, *hymn* 8: A perspective on his poetic art. In Den Boeft, J, Van den Broek, R, Klijn, A F J, Quispel, G & Van Winden J C M (eds.), *Early Christian poetry: A collection of essays*, 263-271. Supplements to *Vigiliae Christianae* 22. Leiden: Brill.
- Barkhuizen, J H 1996. Proclus of Constantinople - Homily 36: On the brevity and futility of human life. *Acta Patristica et Byzantina* 7:1-20.
- Grosdidier de Matons, J 1981. *Romanos le Mélode. Hymnes IV*. Paris: Beauchesne.
- Keydel, R 1956. Zu den Hymnen des Sunesios. *Hermes* 84:151-162.
- Lacombrade, C 1978. *Sunésios de Cyrène. Tome I: Hymnes*. Paris: Les Belles Lettres.
- Mitsakis, K 1971. The hymnography of the Greek church in the early Christian centuries. *Jahrbuch der Österreichischen Byzantinischen Gesellschaft* 20:31-49.
- Quasten, J 1975. Synesius of Cyrene. In *Patrology*, vol. 3:106-114. Utrecht/Antwerp: Spectrum Publishers.
- Wilamowitz-Moellendorff, U von 1907. Die Hymnen des Proklos und Synesios. *Sitzungsberichte der königlich Preussischen Akademie der Wissenschaften* 14:272-295.